



Volfgangus, patre Simone Lazio Medico doctissimo, in Austria natus & educatus est. Hic cum felici ingenio esset præditus, parentis consilio operam literis dedit, & in uirum doctissimum euasit. In primis autem Historias amauit, & res abstrusas patefacere statuit. Adiecit etiam Philosophiæ & Medicinæ studium, in quibus adeò profecit, ut Doctoralia insignia impetrarit. Postea animum ad scribendum appulit, atq; Austriæ prouincias suis scriptis plurimum illustrauit. Nam & Archiducum Genealogiam composuit, & res Vuiensium doctissimè explicauit. Hinc inde quoq; ex superioris Germaniæ monasterijs delitescentes

authores conquisiuit, & sua operâ restitutos in lucem ædere statuit. Id cum Ferdinandus Cæsar cognouisset, eum suum Historicum constituit, & in equestrem ordinem assumpsit, tribus aureis alauidis, ueterum Austriæ marchionum insignibus, adiectis, preciosam insuper uillosi serici uestem donauit, Anno circiter 1545. Itaq; Vuolfgangus ea Cæsaris clementia incitatus, multò diligentius Historias perlegit, & Germanorum uirtutes egregiè manifestauit. Cum hoc modo sibi apud omnes doctos magnum nomen comparasset, tandem anno reparatæ salutis humanæ millesimo quingentesimo quinquagesimo quinto, iam quasi quinquagenarius, Vuiennæ obiit, & honorificè sepultus fuit. Con. Lycosth. Anon.